



Univerzitet u Sarajevu
Upravni odbor

P R A V I L N I K

**O UVJETIMA, NAČINU I POSTUPKU ZA DODJELU SREDSTAVA IZ
FONDA ZA SOCIJALNO UGROŽENE I IZUZETNO NADARENE
STUDENTE UNIVERZITETA U SARAJEVU - „SUADA DILBEROVIĆ“**

Sarajevo, Juni 2008. godine

Na osnovu člana 27. Zakona o ustanovama („Sl.novine RBiH“ br. 6/92,8/93 i 13/94) i člana 153, 162 i 171. Pravila Univerziteta u Sarajevu, Upravni odbor je na svojoj 22 sjednici, održanoj 05. juna 2008. godine, donio

PRAVILNIK
O UVJETIMA, NAČINU I POSTUPKU ZA DODJELU SREDSTAVA IZ FONDA ZA
SOCIJALNO UGROŽENE I IZUZETNO NADARENE STUDENTE UNIVERZITETA U
SARAJEVU - „SUADA DILBEROVIĆ“

1.OPĆI DIO

Član 1.

U cilju poboljšanja statusa socijalno ugroženih i stimulisanja izuzetno nadarenih studenata na Univerzitetu u Sarajevu (u daljem tekstu: UNSA) utvrđuje se Fond za socijalno ugrožene i izuzetno nadarene studente Univerziteta u Sarajevu pod nazivom „Suada Dilberović“ (u daljem tekstu:Fond).

Fond će dodjeljivati sredstva socijalno ugroženim i izuzetno nadarenim redovnim studentima UNSA, a u skladu sa pozitivnim zakonskim normama, posebno iz oblasti socijalne zaštite i prava porodica demobilisanih boraca i porodica poginulih boraca/šehida.

Ovim Pravilnikom se utvrđuju uvjeti i postupci za ostvarivanje prava na materijalnu potporu koju Fond dodjeljuje u cilju osvarivanja svoje svrhe.

Član 2.

Pravo na dodjelu sredstava mogu ostvariti svi redovni studenti dodiplomskog studija UNSA (redovni koje finansira osnivač i redovni-samofinansirajući), koji zadovolje kriterije iz ovog Pravilnika.

2.KRITERIJI ZA SOCIJALNO UGROŽENE STUDENTE

Član 3.

Kriteriji za socijalno ugrožene studente:

- Socijalno-ekonomska situacija:

Za studenti slabog imovinskog stanja bodovanje se vrši u zavisnosti od prihoda domaćinstva, a prema kućnoj listi i priloženoj potvrdi o ukupnom prihodu, potvrdi o nezaposlenosti ili drugoj adekvatnoj potvrdi o imovinskom stanju za svakog punoljetnog člana domaćinstva, kako slijedi:

| | |
|---------------------------|------------|
| -Do 60 KM | 25 bodova; |
| -Od 61 KM do 100 KM..... | 15 bodova; |
| -Od 101 KM do 150 KM..... | 10 bodova; |
| -Od 151 KM do 200 KM..... | 5 bodova; |
| -Od 201 KM do 384 KM..... | 1 bod. |

Ukupan prihod domaćinstva čine prihodi koje članovi domaćinstva ostvaruju po osnovu:

- Plaća i drugih primanja iz radnog odnosa /dokaz od poslodavca/;
- Starosne, invalidske i porodične penzije /ček od posljednje primljene penzije/;
- Poljoprivredne djelatnosti /dokaz od mjesno nadležnog organa/;
- Primanja po propisima o boračko-invalidskoj zaštiti i zaštiti civilnih žrtava rata /dokaz od nadležne općinske službe ili Centra za socijalni rad/;
- Prihoda ostvarenih po osnovu imovinskog prava;
- Prihoda ostavenih po osnovu privredne, uslužne i druge djelatnosti /dokaz od Porezne uprave/;

Napomena: Prihodom se ne smatraju novčane naknade po osnovu prava lica sa invaliditetom, dodatak na djecu, stipendije i krediti studenata i jednokratne pomoći.

- Studenti-djeca bez roditeljskog staranja.....25 bodova;
- Studenti-djeca članovi porodica poginulih boraca i porodica šehida.....25 bodova.

3.KRITERIJI ZA IZUZETNO NADARENE STUDENTE

Član 4.

Kriteriji za izuzetno nadarene studente:

- Kod studenata prve godine studija prvog ciklusa, ostavreni uspjeh se boduje kroz uspjeh u srednjoj školi,/ studenti prve godine koji su u toku srednjoškolskog obrazovanja ostvarili uspjeh odličan ili vrlo-dobar boduju se tako što se za odličan uspjeh prosječna ocjena uvećava za 4 i množi za koeficijentom 5, a za vrlo-dobar uspjeh uvećava se za 3 i množi sa koeficijentom 5/, studentima prve godine koji su bili učenici generacije u srednjoj školi dodaje se 25 bodova/;
- Za studente druge i viših godina studija koji su u prethodnom toku studija ostvarili prosječnu ocjenu najmanje 7 ili 8, bodovanje se vrši tako da se prosječna ocjena množi sa koeficijentom 5, a za studente koji su u prethodnom toku studija ostvarili prosječnu ocjenu najmanje 9, pored množenja sa koeficijentom 5 dodaje se još 5 bodova, stim da se ovih pret bodova uvećavaju po 1 bod za svaki 0,10 boda iznad prosječne ocjene 9.
- Godina studija:
Student druge godine.....4 boda;
Student treće godine.....6 bodova;
Student četvrte godine.....8 bodova;
Student pete godine.....10 bodova;
Student šeste godine.....12 bodova;
- Da nisu ponavljali godinu studija;
- Da prilikom upisa u prvu godinu nisu stariji od 22 godine, a studenti završne godine da nisu stariji od 28 godina;
- Prednost imaju kandidati koji dostave dokaze o sudjelovanju u stručnim, znanstvenim i umjetničkim projektima;
- Pri dodjeli sredstava vodiće se računa o ravnomjernoj zastupljenosti svih grupacija Univerziteta, uvažavajući specifičnosti svake grupacije ponaosob;
- U slučaju da u okviru pojedine grupacije nema kandidata sa prosječnom ocjenom 9 i više, uzeće se u obzir najbolja prosječna ocjena zaprimljenih zahtjeva iz te grupacije.

4.SADRŽAJ APLIKACIJE-PRIJAVE NA JAVNI KONKURS

Član 5.

Aplikacija-prijava za učešće u javnom konkursu mora obavezno sadržavati slijedeće:

- Pismeno obrazloženje zahtjeva za dodjelom sredstava te podatke o postignutim rezultatima studenta;
- Službenu potvrdu o položenim ispitima na dodiplomskom studiju sa prosjekom ocjena;
- Ovjerena kopija svjedodžbi I-IV razred srednje škole /za studente prve godine/;
- Kopija diplome ili uvjerenja o izboru za učenika generacije /za studente prve godine/;
- Uvjerenje da je kandidat prvi put upisao odgovarajuću godinu studija u statusu redovnog studenta i da nije ponavljao niti jednu godinu;
- Ovjerena kućna lista;
- Dokazi o ukupnom prihodu domaćinstva, te potvrda o nezaposlenosti /za svakog punoljetnog člana domaćinstva/;
- Dokaz o statusu člana porodice poginulog borca i šehidske porodice;

- Dokaz o statusu studenta-djeteta bez roditeljskog staranja.

Član 6.

Sredstva iz Fonda će se dodjeljivati u pravilu jednom godišnje, na osnovu utvrđenih kriterija i objavljenog javnog poziva-konkursa koji se raspisuje na osnovu odluke Upravnog odbora UNSA.

Tekst konkursa za dodjelu sredstava mora obavezno sadržavati slijedeće podatke:

- Namjena za koju se dodjeljuju sredstva;
- Iznos sredstava koji se dodjeljuje;
- Vremenski rok na koji se dodjeljuju sredstva;
- Godišnje programske prioritete;
- Rok za podnošenje prijava;
- Način i rok saopštavanja odabira;
- Broj stipendija;
- Opšti i posebni kriteriji za dodjelu sredstava

Iznos sredstava iz prethodnog stava ovog člana ovisit će o iznosu novčanih sredstava koja će biti osigurana u Fondu za ovu namjenu (budžet UNSA i uplate donatora), o čemu odluku donosi rektor UNSA, na prijedlog Odbora Fonda (u daljem tekstu: Odbor) i .

Konkurs se objavljuje na web.stranici UNSA, oglasnoj ploči UNSA i u jednom od dnevnih glasila sa područja BiH.

5. ODBOR FONDA

Član 7.

Prijedlog o dodjeli sredstava iz Fonda utvrđuje Odbor koji se sastoji od 19 (devetnaest) članova, a čine ga:

Predsjednik Upravnog odbora, Rektor, Prorektori; Predsjednici svih grupacija, Generalni sekretar; Predsjednik SPUS-a (Studentskog parlamenta Univerziteta u Sarajevu); Predstavnici SPUS-a po grupacijama i predstavnici kompanija koji su uložili sredstva u iznosu preko 10.000,00 KM, kao pridruženi članovi.

Svi članovi Odbora imaju pravo glasa.

Radom Odbora predsjedava Rektor.

Odbor, nakon isteka rokova za podnošenje prijava, vrši ocjenu i rangiranje prispjelih prijava i utvrđuje konačnu listu sa kandidatima.

Procjena Odbora smatra se valjanom ako se o njoj javnim ili tajnim glasanjem izjasnila natpolovična većina svih članova Odbora.

O toku sjednice Odbora vodi se Zapisnik.

Član 8.

Rektor donosi konačnu Odluku o dodjeli sredstava iz Fonda, na osnovu prijedloga Odbora, u roku ne dužem od 60 dana od dana zaključenja konkursa.

Odluka rektora je konačna i obavezujuća.

Član 9.

Lista dobitnika iz sredstava Fonda objavljuje se na web.stranici UNSA, oglasnoj ploči UNSA i u jednom od dnevnih glasila sa područja BiH.

Član 11.

Sa dobitnikom/icom sredstava Fonda, Rektor UNSA zaključuje Ugovor o dodjeli sredstava, na obrascu ugovora čiji je sadržaj utvrđen ovim Pravilnikom.

Član 12.

Ugovor iz prethodnog člana ovog Pravilnika se sklapa u pisanom obliku i obavezno sadrži:

- Osnovne podatke o ugovornim stranama;
- Predmet ugovora;
- Iznos dodjeljenih sredstava i način isplate;
- Rok na koji se sredstva dodjeljuju;
- Obaveza izvještavanja ugovorne strane o realizaciji predmeta ugovora;
- Odredbe o povratu sredstava u slučaju nepridržavanja uslova iz ovog Pravilnika i ugovora;
- Mjesto i datum sklapanja ugovora i potpise ugovornih strana.

Član 13.

U slučaju da neko od pitanja nije riješeno ovim Pravilnikom na odgovarajući način imaju se primjeniti odredbe Pravila Univerziteta u Sarajevu, Zakona o visokom obrazovanju, kao i drugih akata Ministarstva za obrazovanje i nauku KS koja se odnose na dodjelu sredstva za projekte, stipendije i nagrade.

6. PRELAZNE I ZAVRŠNE ODREDBE

Član 14.

Ovaj Pravilnik stupa na snagu danom donošenja.

**PREDSJEDNIK
UPRAVNOG ODBORA**

Prof. dr. Sead Redžepagić



Broj: 02-I-1805/08

Datum, 05.06.2008. godine